

# LU GRANDE DICÔCE

(Mœurs Ardennaises)

Gaston LUCY



Lu grande dicôte du Bîve è lieu à l'Sint Hubèrt, è adon, i fwêt d'jà frèd.

Les vîs d'jint:

*Dj'ans vû des anéyes k'on plot rèchu à l'dicôte avu l'mantê su l'brès, tèlmint k'î f'jot bon, mês dj'ans vû niver ossi.*

Çut'anée là, il avot fwê bon tous les djous d'avant la dicôte et l'timps d'mèrot à clér.

I djalotot à matin , et du djou, lu solê loujot; les djon.nes djins astint binâjes.

Cand l' vinr'di è arivé, les fames ont c'maçî à fwêre les doréyes et les rou.yos, pî à nèti.yî leu màjon. Les oumes n'avint nin trop à rinter à l'mâjon, çu djou-là.

Amon les Blossy, on f'jot les doréyes ossi, coume partout, mês is n'avint k' du vert bwès pou tchâfer leu four.

Coume i n' s'édint du four ku 2 û 3 côps su l'anée et ku c'ére djà in vî four, çut-çi astot toudis frèche, surtout k'il astot abudé conte hurée. Il astot don malâjî d'î coûre.

Si bin ku la Tazîe avot d'mandé à ène vèjine du la lêchî coûre ou sène.

Çu vèjine-là, ç'astot la grosse Tèréze.

I gn'avot lon pou pwârter les doréyes d'amon les Blossy jusk' amon la Tèréze, et çut'çile duvot coûre la prèmière, coume du jusse., surtout k'ile avot co promis l' four à des ôtes fames, duvant la Tazîe.

La Tazîe s'y avot mâ pris. Ile n'avot d'mandé l'four ku cand la pâsse astot prète à l'ver.

Et, coume in fêt esprès, tins ku la pâsse rul'vot, les djon.nes Blossy n'ont nin arèté d'uchi.yî (ouvrir et fermer la porte sans arrêt).

La Tazîe, du vèy ku rin n'alot, astot aradjîe.

Ile avot bin sa.yî du mète lu feu ou four, mês çà n'purdot nin, la fumîre boukiot dins l'fourni, si fwârt k'in gn'avot nin moyin d'î dèrer.

Çà n'astot nin ètonnant, k'la fumîre ruv'not insi, les djon.nes oumes avint fôré in wazon dins la tch'minée. Ç est d' çà ku la Tazîe è sté oblidyîe du r'kester la vèjine.

Çà fwêt kwè ,k'ile dit à l' Tèréze, *Cand k' dj'ôré l' four ?*

Çà prèsse ? dit-ile l'ôte.

*Bin, a.y, dit-ill' la Tazîe, ma pôsse est an trin d'rul'ver et dj'ôros peu d'manker ma coûtée.*

*Bin, dit-ile l'ôte, vous vèrîz d'mwin d'vè 2 heures du l' vèspréye, i s'rè libe, dju vous l'rutêré.*

La Tazîe è ralé aradjîe; ile chumot !

Rarivée à l'mâjon, ill' è c'maçîf à tasticoter (parler sans mesure), ile nu djot ku ç' k'ile dijot d' abitude, des bêtises, pî ile è apougnî l' Zande pou li fwêre tchâfer l'four.

I n'n'è bin vu, l'malèreu, è i n'è co sù rin fwêre.

*Dju n' sâros pon awè d'feu là-d'dins, là, mi, dit-i l'Zande.*

*Tu n'es k'in bon à rin, wête dins la tch'minée, si gn'è rin ki jin.ne.*

Il è yu bê grèvissî avu ses mwins, i n'è rin vû. I s'è avisé alòrs du monter su l'tèt du fourni è du fourgouner dins la tch'minée avu ène piêtche.

Tout d'in côp, il è sintu yâk, il è poussî pu fwârt et la piêtche è passé oûte. Lu wazon avot cédé.

La Tazîe, ki wêtot justumint d'zous la tch'minée à ç'moumint-là è ramassé ène boune afwêre du choufe su l' muzê; ile astot arandjîe, savèz, il è falu k'ile vaje su r'lâver du fond an combe.

Çà n' l' è nin fwêt duscoléré du l' journée: lu pôve Zande n'è yu k'à sêwer jusk'à l' nute.

Il avot des soupçons su 2-3 gayoufs (garnements) et i s'è juré du les rawè à l' prumîre ocâsion. Mês, ça, ça n'avançot wère la Tazîe avu sa pâsse.

Çut' çile après awè rul've 3-4 côps, n' è pu volu boudjî.

La Tazîe è don apougnî lu fiêr à wâfes et ile è ataké les galètes. La pâsse colot ou fiêr, les galètes atatchint . Lu rèsultat astot pu k' minâbe.

E kwè fwêre, pourtant ?

A l'dicâce, ile invitot les parints d' Crapôry, et les çîs des Misères, pî ynk û deux d' Mon-Idée. Is d'vint bin v'nu à 17 et ile n' avot rin pou les r'çîre (recevoir).

Coume tchâr, ill' avot don lu p'tit courî, deux mêgues lapins, in cokê, et in saké boudin (médiocre)... è pî les galètes.

Les çîs d'Crapôry v'nint d'jà lodjî à quate lu djou du d'vant.

Dins ses malheûrs, la Tazîe avot la chance k'il avot fwê bon jusk'à là.

Mês, l' sam'di à midi, lu timps s'è brouyî et, d'vè 3 heûres, il è c'maçî à plûre, coume si on l' ârot yu tapé. Impossibe du rêchu !

Les parints d'Crapôry, k'avint v'nu jusk' à l' Pèlée Virée ont d'vu z'araler.

Lu dimadje, ç'astot co pî. I n'avot nin arètê du l'nutîe. Si bin k'on n'savot rêchu l'dimadje non pu. I n'è don pon v'nu d'parints; i n'ârint sû s'mète an route . I fjot in timps d' tchin.

Ile a n'è jusse oyu 3 des pu djon.nes des Mizères, k'ont v'nu à l'messe des mwârts, lu lindi.

Falot vèy la binète du l'Tazîe cand ile 'è apwârté les galètes et l'café às parints, zès ki comptint awè du l'doréye.

Ile è ataké à lz' î èspliker ç'è ki gn' avot yu. Cand ile è arivé à l'histwâre du wazon, les parints ont yu vite compris. I savint bin k'on riot d' zès dins l'viadje et k'on l'zî fjot souvint des farces.

I n'ont rin fwê vèy, mêt is' ont dit dins z'ès min.mes, ki n' î r'vérint pus.

C'est nin pou çà, mêt i gn'è wère yu d'monde à l'dicâce. Les barakîs, ki n'avint rin fwêt non pu, ont d'mèré pou les r'likàs. Il y fjot mè.yeu et la vrêye dicâce s'è passée çu djou-là.

Amon les Blossy, il' ont yu des galètes pou la s'mwin.ne è i n'ont sté rassapinés. (Repus).

Ké dicâce, çut' anéye-là !

Gaston LUCY